

CBETA電子佛典集成

CBETA Chinese Electronic Tripitaka Collection
ebook

T10n0281

佛說菩薩本業經

吳支謙譯

中華電子佛典協會



目次

- [編輯說明](#)
- [章節目次](#)
 - [2_願行品](#)
 - [3_土地品](#)
- [卷目次](#)
 - 001.
- [贊助資訊](#)

編輯說明

- 本電子書以「CBETA 電子佛典集成 Ver si on 2022.Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 281 [Nos. 278(7, 11), 279(11, 15), 282]

佛說菩薩本業經一卷

吳月氏優婆塞支謙譯

聞如是：

一時佛遊於摩竭道場，初始得佛，光景甚明，自然蓮華寶師子座，古昔諸佛所坐皆爾，道德威儀相好如一，身意清淨，福行普具，明所徹照人剎法處，去來現在無復罣礙，成興於世，一切悉等。時會菩薩，盡一生補處，神通妙達，周遍十方，導利眾生，開佛法藏，示泥洹要，都入人根，宿命智德，善權方便，訓化以漸，解內外法，終始不搖，等諸佛土，無所分別，讚揚佛名，不可稱極，三塗之事，靡不貫達，至皆歎曰：「佛念吾等，建立大志，能悉現我諸佛世界所有好惡，殊勝之國，佛所遊居，興隆道化，光明神足，教訓天人，啟示法意，佛之本業，十地十智，十行十投，十藏十願，十明十定，十現十印，斷我瑕疵及諸疑妄，悉為我現佛行佛智，佛神佛力佛定，無量變化隨時，四事不護，四無所畏，十八不絕，一切敏慧，無上道德，眾事敷露。」

東去無極， 有香林剎，
佛名入精進， 菩薩字敬首；
南去無極， 有樂林剎，
佛名不捨樂， 菩薩字覺首；
西去無極， 有華林剎，
佛名習精進， 菩薩字寶首；
北去無極， 有道林剎，
佛名行精進， 菩薩字慧首；
東北無極， 有青蓮剎，
佛名悲精進， 菩薩字德首；
東南無極， 有金林剎，
佛名盡精進， 菩薩字目首；
西南無極， 有寶林剎，
佛名上精進， 菩薩字明首；
西北無極， 有金剛剎，
佛名一乘度， 菩薩字法首；
下方無極， 有水精剎，
佛名梵精進， 菩薩字智首；
上方無極， 有欲林剎，
佛名至精進， 菩薩字賢首。

是賢首等，皆彼第一，各與無數上人俱來，稽首佛足，坐一面蓮華上。彼時敬首菩薩，承佛聖旨，歎曰：「快哉，今上人會，為未曾有，觀其所止，佛國清淨，至於被服如來德戒，修行微妙成覺根力，演說經法，得佛威神，隨剎清濁，度人無極，分流道化，靡不周匝，於此佛土，國殊別者億百千姦，賢愚好醜，長短壽夭，種種言異，皆聞佛德，各自名之，或有名佛為大聖人，或有名佛為大沙門，或號眾祐，或號神人，或稱勇智，或稱世尊，或謂能儒，或謂昇仙，或呼天師，或呼最勝，如是十方諸天人民，所稱名佛億萬無數，此皆佛本發意以來，班宣道化，所誨之徒也。」

◎是時，佛放足下相輪光明，悉照佛界諸小國土，一小國土者，一須彌山日月運繞照四天下，東弗于逮，南閻浮提，西拘耶尼，北鬱單越，四周大海，鐵垣圍表，上有二十八天，如此者為一小國土，周匝十方合有百億。

是時悉現百億須彌山，百億日月，及四天王天、忉利天、炎天、兜術天、不憍樂天、化應聲天、梵天、梵眾天、梵輔天、大梵天、清明天、水行天、水微天、水無量天、水音天、約淨天、遍淨天、淨明天、守妙天、微妙天、廣妙天、極妙天、福愛天、愛勝天、近際天、善觀天、快見天、無結愛天、識慧天、無所念慧天，至二十八無色天，各有百億。此為一佛剎，號曰忍世界，釋迦文佛，分身百億，悉遍其中。於時天人，覩眾小國，諸佛菩薩，若近相見。

願行品第二

智首菩薩問敬首曰：「本何修行？成佛聖道，身口意淨，不念人惡，亦使天下不得其短，仁慈至大，內性明了，殊過弟子別覺之上，一切眾邪莫能迴動，出生端正，色相無比，族姓尊貴，知重佛法，自守志強，常行四等，高才敏達，精進勇健，習眾德本，諸度無極，所為無量，恒生福地，言見信用，降心正意，攝念入禪，曉空無想不願之法，出入四大，五陰六入，十二緣起，七覺不闕，通十力智，博入諸道，濟危解厄，為釋梵所敬，除闇冥如燭火，明天下如日月，度眾人如船師，賢過三界而為上首，欲成斯道，當何修行？」

敬首答曰：「善哉佛子！志仰高遠，極大慈哀，愍傷十方。若族姓子族姓女，欲成佛道者，當先正身，言念相應，口習經典，心思可行，改往修來，不釋道意，積德累善，施恩不倦，然則所問悉可得也。為菩薩者，必諦受學，如佛法教，無得增減，以誓自要，念安世間，奉戒行願，以立德本。」

「居家奉戒，	當願眾生，	貪欲意解，
入空法中。	孝事父母，	當願眾生，
一切護視，	使得佛道。	順教妻子，
當願眾生，	令出愛獄，	無戀慕心。
若得五欲，	當願眾生，	皆入清淨，
心無所著。	若在伎樂，	當願眾生，
悉得法樂，	歡喜之忍。	著寶瓔珞，
當願眾生，	解去重擔，	無綺可意。
見諸姝女，	當願眾生，	棄捐色愛，
無姪姝態。	若上樓閣，	當願眾生，
皆昇法堂，	受佛諸經。	身在房室，
當願眾生，	覺知惡露，	無有更樂。
布施所有，	當願眾生，	興福救之，
莫墮慳貪。	若患厭家，	當願眾生，
疾得解脫，	無所拘綴。	若棄家出，
當願眾生，	離苦惱罪，	從正得安。
入佛宗廟，	當願眾生，	近佛行法，
無復罣礙。	詣師友所，	當願眾生，
開達入正，	悉得如願。	請求捨罪，
當願眾生，	得成就志，	學不中悔。
脫去白衣，	當願眾生，	解道修德，
無有懈怠。	受著袈裟，	當願眾生，
被法服行，	心無沾污。	除剔鬚髮，
當願眾生，	除捐飾好，	無有眾勞。
已作沙門，	當願眾生，	受行佛意，
開導天下。	受成就戒，	當願眾生，
得道方便，	慧度無極。	守護道禁，
當願眾生，	皆奉法律，	不犯法教。
始受和上，	當願眾生，	令如禪意，
思惟解脫。	受大小師，	當願眾生，
承佛聖教，	所受不忘。	自歸於佛，
當願眾生，	體解大道，	發無上意。
自歸於法，	當願眾生，	深入經藏，
智慧如海。	自歸於僧，	當願眾生，
依附聖眾，	從正得度。	凡開門戶，
當願眾生，	開現道法，	至於泥洹。
關閉門戶，	當願眾生，	閉塞惡道，
罪得除盡。	入室當願，	一切眾生，

安隱寂寞，	得止觀意。	敷床當願，
一切眾生，	入大乘道，	濟安天下。
宴坐當願，	一切眾生，	坐佛道樹，
心無所猗。	入眾當願，	一切眾生，
成戒定慧，	解度知見。	數息當願，
一切眾生，	得捨家中，	無世間念。
守意當願，	一切眾生，	心不放逸，
無有雜念。	早起當願，	一切眾生，
覺識非常，	興精進意，	下床當願，
一切眾生，	履踐佛迹，	心不動搖。
著裳當願，	一切眾生，	常知慚愧，
攝意守道。	結帶當願，	一切眾生，
束帶修善，	志無解已。	次著中衣，
當願眾生，	恭敬畏慎，	無有慢墮。
被上法服，	當願眾生，	服聖表式，
敏於道行。	左右便利，	當願眾生，
蠲除污穢，	無姪怒癡。	已而就水，
當願眾生，	柔和軟弱，	清淨謹飾。
用水既淨，	當願眾生，	以法自洗，
無復惡態。	手執楊枝，	當願眾生，
學以法句，	擲去諸垢。	澡漱口齒，
當願眾生，	蕩滌情性，	如清淨住。
盥手當願，	一切眾生，	得軟淨掌，
執受經道。	澡面當願，	一切眾生，
常向清淨，	心無瑕疵。	出門當願，
一切眾生，	如佛所欲，	出度三界。
向道當願，	一切眾生，	向無上道，
志不退轉，	行道當願，	一切眾生，
遊於無際，	不中休息。	上坂當願，
一切眾生，	樂昇上道，	無所疑難。
下坂當願，	一切眾生，	深入廣博，
微妙法中。	行於曲路，	當願眾生，
棄邪曲意，	行不忤忤。	行於直路，
當願眾生，	得中正意，	言無諛諂。
見風揚塵，	當願眾生，	經明行修，
心不紛亂。	見雨淹塵，	當願眾生，
大慈伏意，	不起諸想。	涼息樹下，
當願眾生，	伏心在道，	經意不疲。

入林澤中，	當願眾生，	學為儒林，
養徒以德。	行見高山，	當願眾生，
志仰高大，	積德無厭，	行見刺棘，
當願眾生，	三毒消滅，	無賊害心。
得好葉樹，	當願眾生，	以道自蔭，
入禪三昧。	樹華繁熾，	當願眾生，
三十二相，	諸好滿具。	果蓏盛好，
當願眾生，	起道樹行，	成無上果。
覩諸流水，	當願眾生，	得正溝流，
入佛海智。	覩諸陂池，	當願眾生，
一切功德，	慧行充滿，	若見泉水，
當願眾生，	入佛淵智，	所問無窮。
遙望江海，	當願眾生，	入深佛藏，
無盡之法。	見人汲井，	當願眾生，
開心受法，	得一味道。	過度橋梁，
當願眾生，	興造法橋，	度人不休。
見修園圃，	當願眾生，	耘除穢惡，
不生欲根。	見田稻穀，	當願眾生，
廣殖福德，	不為災患。	見好園圃，
當願眾生，	得周滿持，	道法備具。
見丘聚舍，	當願眾生，	常處仁智，
道無危殆。	見精學堂，	當願眾生，
講誦經道，	日進不衰。	見人眾聚，
當願眾生，	功滿得佛，	成弟子眾。
見人閑居，	當願眾生，	恬惓無為，
遊志典籍。	得見沙門，	當願眾生，
多聞戒具，	誨人不倦。	見異道人，
當願眾生，	遠去邪見，	入八正道。
得見仙人，	當願眾生，	意行具足，
所欲者成。	行到城郭，	當願眾生，
持戒完具，	心無虧缺。	望見宮闕，
當願眾生，	聰明遠照，	諸善普立。
若見帝王，	當願眾生，	得奉聖化，
如正道教。	見帝王子，	當願眾生，
履佛子行，	化生法中。	若見公卿，
當願眾生，	明於道理，	助利天下。
見諸臣吏，	當願眾生，	忠正順善，
無固賊心。	見被鎧甲，	當願眾生，

誓被法鎧，	不違本願。	見魯鈍人，
當願眾生，	勇於道義，	成四無畏。
見憂愁人，	當願眾生，	離諸恐怖，
無復憂戚。	見喜笑人，	當願眾生，
捨非常樂，	五欲自娛。	見勤苦人，
當願眾生，	得泥洹道，	免度諸厄。
見安樂人，	當願眾生，	安快如佛，
憊怕無患。	見疾病人，	當願眾生，
知空非身，	無苦痛意。	見強健人，
當願眾生，	得金剛形，	無有衰耗，
見醜陋人，	當願眾生，	去醜惡行，
以善自嚴。	見端正人，	當願眾生，
意行質直，	愛好道法。	見報恩人，
當願眾生，	念佛恩德，	行菩薩行。
見背恩人，	當願眾生，	降心伏意，
棄捐諸惡。	見貪欲人，	當願眾生，
法施天下，	無慳貪意。	行持錫杖，
當願眾生，	依仗於法，	分流德化。
挾持應器，	當願眾生，	受而知施，
修六重法。	入里分衛，	當願眾生，
如戒法求，	無得疑妄。	到人門戶，
當願眾生，	入總持門，	悉見諸法。
入人堂室，	當願眾生，	昇佛聖堂，
深行微妙。	人不與食，	當願眾生，
得般若意，	無望無惜。	主人未辦，
當願眾生，	離三惡道，	無飢渴想。
授空應器，	當願眾生，	皆得至空，
無欲之性。	受滿應器，	當願眾生，
一切成滿，	道品之法。	擎持鉢飯，
當願眾生，	為法供養，	志在大道。
與廉人坐，	當願眾生，	廉潔知恥，
所作不妄。	坐有貪人，	當願眾生，
無有強顏，	貪鄙之心。	得香美食，
當願眾生，	知節少欲，	情無所著。
得不美食，	當願眾生，	知身幻法，
好惡無異。	舉飯向口，	當願眾生，
悉得諸經，	諸佛法味。	所噉雜味，
當願眾生，	味味如佛，	化成甘露。

飯食已訖，當願眾生，德行充盈，
成十種力。講經說法，當願眾生，
志意開達，聞法即寤。呪願達觀，
當願眾生，悉令通佛，十二部經。
罷坐退去，當願眾生，一切究竟，
得三甘露。若欲入水，當願眾生，
身口意淨，等於三塗。澡浴身體，
當願眾生，蕩除心垢，見生死際。
盛暑熱極，當願眾生，得清涼定，
滅一切苦。冰凍寒甚，當願眾生，
心冷愛除，無復情欲。誦讀經偈，
當願眾生，博解諸法，無復漏忘。
若得見佛，當願眾生，常與佛會，
行七覺意。見佛圖像，當願眾生，
悉覩十方，眼無障蔽。拜謁佛時，
當願眾生，得道如佛，莫能見頂。
稽首而起，當願眾生，皆如佛意，
尊貴無上。始欲旋塔，當願眾生，
施行福祐，究暢道意。繞塔三匝，
當願眾生，得一向意，不斷四喜。
行詠歌經，當願眾生，念佛恩德，
行法供養。畢住讚佛，當願眾生，
光明神德，如佛法身。暮將洗足，
當願眾生，得四神足，周遍十方。
昏夜寢息，當願眾生，離於闇冥，
無復五蓋。臥覺當願，都使眾生，
得佛十八，不絕之法。是為菩薩，
誠願俱行，兼愛博施，不捨十方。」

十地品第三

於是忍世界百億天帝釋，皆於忉利紫紺殿上，化作七寶師子之座，施交露帳，席以綵絜已，各稽首請佛。佛意悉知，即為分身，遍諸釋殿，一一佛者，從眾菩薩，一切天帝，莫不悅豫；其下百億小國，續自見佛，如故不減。時十方剎，復來雲集，法意菩薩、首意菩薩、賢意菩薩、勤意菩薩，思意、知意、審意、專意、重意、盡意菩薩等，各從十方，與無數上人俱來，稽首佛足坐一面蓮華上。

法意菩薩即如其像，正坐定意，入於無量會見三昧，悉見十方無數諸佛，各伸右手摩其頭，俱言：「善哉！法意！菩薩勇健，乃得是定，十方如來，及釋迦牟尼佛，已皆拜汝成立功德，修微妙辯，知空無著行，究暢法要，通諸佛語，知眾生意。汝行已備，得佛不久，今使汝說菩薩十住，令諸學者普知所行。」

於是法意菩薩，得佛辯辭，明哲至真，不忘不難，從定意覺而言曰：「諸族姓子！欲求佛者，有十地住，往古來今，皆由此成，眾祐所歎，是合無量，具陳演說，如佛所言。何等為十？第一發意，第二治地，第三應行，第四生貴，第五修成，第六行登，第七不退，第八童真，第九了生，第十補處。」

「何謂發意？菩薩法住，有十事，謂初見佛，十功德起：一見佛端正，二身色相具，三神足現化，四道德深奧，五儀法無比，六謂知人意，七出經教明，八所言諦解，九見生死苦，十體樂佛法，稍稍開解，便發道意。欲曉了佛十力之智，其學有十：當知禮事諸佛，當曉說菩薩德，當諦了生死本，當願修貴治福，當令行勝三界，當學諸佛功德業，當求更見諸佛，當習行諸深三昧，當悲念諸罪苦人，當從生死輪還，是為上頭初發意之地。」

「何謂治地？菩薩法住，有十事，以次學：一念人善，二淨潔心，三柔軟意，四安靜志，五常布施，六行慈愛，七利天下，八助平均，九視彼如己，十敬人如師。復有十學：當多諷經，當遠鄉土，當近明師，當學善言，當知時，當精進，當入要，當曉行，當不忘，當安志，是為次第治地之行。」

「何謂應行？菩薩法住，有十事，入如經：一見無常，二見生苦，三見行空，四見非身，五見無主，六無所貪，七無所著，八無為，九無欲，十無求。復有十學：當念人，當念剎，當念法，當念地種，當念水種，當念火種，當念風種，當念欲界，當念色界，當念無色界，心無戀慕，是為分別應行之地。」

「何謂生貴？菩薩法住，有十事，隨佛行：一不還邪道，二專心向佛，三思惟法意，四觀功德行，五見人如化，六見剎如夢，七見殃福空，八見諸法如幻，九苦樂無異，十解泥洹淨。復有十學：當知思念，去佛意空，來佛意空，今佛意空，去佛法淨，來佛法淨，今佛法淨，去佛自然，來佛自然，今佛自然，諸佛興等，皆無所異，是為平等生貴之地。」

「何謂修成？菩薩法住，有十事，行濟人：一為人方便，二令人安隱，三賑救天下人，四慈念一切，五悲傷眾生，六令人歡喜，七護視人物，八勸令隨道，九為現清淨，十令得泥洹。復有十學：當知眾生，無有要，無有種，無有數，無有造，無有正，不可思，不可稱，不可度，不可具說，為一切空，是為聖行修成之地。」

「何謂行登？菩薩法住，有十事，度輒成：一聞稱佛譏佛心無異，二聞譽法毀法心無異，三聞菩薩善菩薩惡心無異，四聞人相評論心無異，五聞人眾人寡心無異，六聞經多經少心無異，七聞生苦生樂心無異，八聞人難度人易度心無異，九聞法興法衰心無異，十遭有道遭無道心無異。復有十學：心無想，不受想，不計身，無我所，無有見，無有主，無有受，為如化，為不成，無所有，是為盡信行登之地。」

「何謂不退轉？菩薩法住，有十事，志牢強：一言有佛無佛不退轉，二言有法無法不退轉，三言有菩薩無菩薩不退轉，四言有求佛無求佛不退轉，五有得佛無得佛不退轉，六曰古有聖道無聖道不退轉，七今有聖道無聖道不退轉，八後有聖道無聖道不退轉，九言三塗同三塗異不退轉，十言佛智有盡佛智無盡不退轉。復有十學：開微慧入大智，開大智入微慧，現一法入眾經，現眾經入一法，解眾生入空要，解空要入眾生，釋有想入寂定，釋寂定入有想，說少淨入多想，說多想入少淨，是為轉進不退之地。」

「何謂童真？菩薩法住，有十事，隨所入：一身口意不犯，二一切無瑕疵，三志壹在所生，四見人知內慈，五知人心所信，六知人意所解，七不受彼雜想，八知諸剎成敗，九神足疾遍到十方，十周滿持諸法。復有十事：學知佛世界，學如佛智能，學現佛神足行，學莊嚴諸佛剎，學遍遊諸國土，學法答眾問，學化無不現，學佛聲出諸法，學轉頃匝十方，學作一念見無數佛，是為清淨童真之地。」

「何謂了生？菩薩法住，有十事，受慧見：一知一切生何道，二知眾生所習縛，三知人本所更來，四知人所行殃福之報，五知人受行何法，六知人心所入好惡，七知人意念若干變，八知十方國清濁，九知三塗無量慧，十知諦要說如應。復有十事：學法王正行，學法王禮儀，學法王興立，學法王出入，學法王周旋，學法王威嚴，學法王坐起，學法王教令，學法王拜人，學法王巡行剎土，是為受決了生之地。」

「何謂補處？菩薩法住，有十事，智難及：一當念感動無數國，二當為無數國現明，三當為無數國立法，四當為開度無數國，五當利安無數國，六當聲曉無數人，七當觀察知眾生意，八當知眾生無極念，九當令無數人入法，十以次第現人慧了。生所不能及補處者十：不能知其身事志行，神足定念，達古知今，見後明處，及修剎法，聖意之事，補處所欲。又有十事：學佛三塗無際之慧，學具足諸佛法，學法法無所著，學諸佛無底藏，學神智成其剎，學光明照十方，學佛定感動諸國，學權道隨意化，學遍教令成就，學合會轉法輪。所以學者，欲一切知，已一切敏，無所復學，是名為補處。從十法成，現世得紹代無上正真之道，為最正覺，度脫天下。」

佛言：「善哉，善哉！法意菩薩，可謂佛子。一切十方去來現佛，皆由此興，是法無際，所照無量，度人無極，智心無盡。」
佛說是已，皆大歡喜，為佛作禮。
佛說菩薩本業經

CBETA 贊助資訊

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號：1 9 5 3 8 8 1 1

戶名：財團法人西蓮教育基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
